



Ustavni sud Bosne i Hercegovine, na osnovu člana 77. stav (1) tačka i) Pravila Ustavnog suda Bosne i Hercegovine – prečišćeni tekst („Službeni glasnik Bosne i Hercegovine“ broj 94/14), a u vezi sa članom 13. stav (2) Zakona o ravnopravnosti spolova u Bosni i Hercegovini – prečišćeni tekst („Službeni glasnik Bosne i Hercegovine“ broj 32/10), na sjednici održanoj 8. septembra 2021. godine donio je

**ODLUKU**  
**O POLITICI NULTE TOLERANCIJE PREMA DJELIMA SEKSUALNOG**  
**UZNEMIRAVANJA I UZNEMIRAVANJA NA OSNOVU SPOLA**  
**U USTAVNOM SUDU BOSNE I HERCEGOVINE**

**Član 1.**

Ustavni sud Bosne i Hercegovine je opredijeljen da osigura radnu sredinu bez seksualnog uznemiravanja i uznemiravanja na osnovu spola za sva lica.

**Član 2.**

Niko nema pravo da seksualno uznemirava ili uznemirava na osnovu spola bilo koje lice na radnom mjestu i u vezi sa radom.

Navedeno se posebno odnosi na:

- a) pravo na radnu sredinu bez seksualnog uznemiravanja i uznemiravanja na osnovu spola;
- b) obavezu reagiranja kada su druga lica žrtve seksualnog uznemiravanja i uznemiravanja na osnovu spola;
- c) obavezu prijavljivanja seksualnog uznemiravanja i uznemiravanja na osnovu spola;
- d) pravo na povjerljivost podataka disciplinskog postupka.

**Član 3.**

Seksualno uznemiravanje ili uznemiravanje na osnovu spola su zabranjeni zakonima Bosne i Hercegovine.

Ovim propisima je utvrđeno da seksualno uznemiravanje i uznemiravanje na osnovu spola postoji kada se radi o ponašanju koje je:

- a) neželjeno;
- b) verbalno, neverbalno ili neprimjereno fizičko ponašanje;
- c) seksualne prirode ili na osnovu spola;
- d) zastrašujuće, neprijateljsko, degradirajuće, ponižavajuće ili uvredljivo ili kojim se postiže takav učinak.

#### **Član 4.**

Ustavni sud Bosne i Hercegovine će preduzeti sve mjere utvrđene pozitivnim propisima kako bi se ispitale sve okolnosti vezane za seksualno uznemiravanje i uznemiravanje na osnovu spola na radu i u radnim odnosima, te će osigurati da lice koje prijavi ova djela neće trpjeti posljedice zbog te činjenice.

#### **Član 5.**

Svaki zaposleni Ustavnog suda Bosne i Hercegovine ima pravo podnijeti inicijativu za pokretanje disciplinskog postupka ukoliko smatra da je seksualno uznemiravan i/ili uznemiravan na osnovu spola.

#### **Član 6.**

Predsjednik Ustavnog suda Bosne i Hercegovine će posebnim rješenjem imenovati savjetnika/savjetnicu za prevenciju seksualnog uznemiravanja i uznemiravanja na osnovu spola.

Imenovani savjetnik/savjetnica će zaposlenim pružiti podršku i neophodne informacije o relevantnim zakonskim i podzakonskim aktima u smislu ostvarivanja zaštite od seksualnog uznemiravanja i uznemiravanja na osnovu spola.


#### **Član 7.**

Ova odluka stupa na snagu narednog dana od dana donošenja i objavit će se na internetskoj stranici Ustavnog suda Bosne i Hercegovine [www.ustavnisud.ba](http://www.ustavnisud.ba).

Broj: SU-03-871/21

Sarajevo, 8. septembra 2021. godine

Predsjednik  
Ustavnog suda Bosne i Hercegovine



Mato Tadić